



Jetzt mache sie emol e Fuscht, und dien sich konzentriere  
Ihrem vis-à-vis schlön sie eins, ohne sich d'schiniere  
Boschwändend wird e Antwort koo uff ihri Reaktion  
Fussballfans nenne das – normali Kommunikation

E Bohrturm stoot jetzt in Basel – es schittlet, beebt und gracht  
Die bore, bore, bore und bore e ganze dieffe Schacht  
Me hätt doch besser e Bohrig gmacht bi dr Schneider Babsi  
Warmi Luft wär usekoo und zuedäm wärs no glatt gsi

Mehr Saggäld hän mir zwai bykoo, dass finde mir voll krass.  
Wenn's Schutzgäld zahlt isch in dr Schuel hän mir drum mehr Spass.  
Mir chönne jetzt, ohni schwitze, unseri Pause gniesse  
Zämme zugge mien mir nümm, wenn öbber afoht schiesse

Für Jung und Alt isch das halt aifach nur e Sucht  
E Läggerli isch us Basel und aifach nur e Wucht  
Doch wär wott e Blocher-Zältli – so cha das nit laufe  
Als Vergältig duet jetzt s'Gigi – d'EMS-Chemie uffkauffe

Loggifierer, Jetpilot und Arzt hän mir welle wärde  
Chef si innere grosse Bangg wäri s'töllscht uff Ärde  
Doch dr neuschi Zuekunftstrend, s'trifft Fraue und au Männer  
Traumbruef für die junge Lüt - isch Sozialempfänger

E US Spion hett em Georgli Dabbelju grad brichtet  
E Basler Gruppe würd ihm koo hälfe, jo das haig är gsichtet  
dass dä Dotsch uns nid verstoht, mir finde das voll harsch  
Nur will dä Major gschraue hett - „Arabi, vorwärts, Marsch“

Basel söll e Vorort si vo Ziri's Metropole  
Y glaub das nid, ych ha do s'Gfühl die wänn uns nur verkohle  
S'cha nid syy, dass die Zircher meine sie sin im Renne  
Solang die jöhrlich komischi - Bööge dien verbrenne  
...und für die glatte Zircher hän mir folgendi Idee  
das Schildli wärdet ihr ab jetzt an eure Stroose gsee

Ziri brucht e neue Name und zwar ein mit Rasse  
Sommerau - hän mir uns dänggt würd prima zur Stadt basse  
E Namenswäggsel isch ächt böimig und no richtig schlau  
Denn Ziri isch im Winter scheisse - und im Sommer au

E Vater hett uns letschti glaagt, si Sohn das sig kai Ängel  
Är muess ihn mängmol richtig schüttle, so fräch sig dä Bängel  
Doch jetzt hett är das schimpfe satt und mäld ihn ab dehai  
Är schick ihn nach Glaihyynige - dört schittlets ihn elai

- Mozarts „Idomeneo“ hett meh jetzt abgesetzt  
will politisch inkorräggd dr Mohammed wird verletzt
- Othello hett meh müesse striche, will das s'Gsetz duet bräche  
denn dört duet e Schwarze grad e Wisse abestäche
- Au d'Dierschützer hän verlangt, dass will meh nümme gsee  
das uf dr Biihni e Dierli stirbt, dass bim Schwanesee
- E Menscherächtler hett d'Aida Opere jetzt versaut  
es cha nit syy, dass e Sklav d'Pyramide gratis baut
- D' Analphabete hän e fang e riese grossi Wuet  
fühle sich diskriminiert vo dere Buecherfluet
- Und au d'Pfadigruppe müen sich jetzt scheniere  
wenn si bim Bahnhof obe e Bömbli düen blatziere
- Und au alti Grooosis finde das nit famos  
kaufft e Yakin di Liegeschaft stoosch grad uff dr Stroos
- D'Vegetarier sin erbost wenn si durch d'Stadt laufe  
will an jedem zwaite Egge e Döner hüt kasch kauffe
- Dr Adam hett dr Eva immer blind vertraut  
mit eme Öpfel hett die Gritte si Läbe denn versaut
- Mir mien jetzt bald es isch kai Witz diend mi nit agaffe  
us religiöse Hintergründ d'Wiehnachtszyt abschaffe
- Für so viel Minderheite isch es schwär e Värslu d'schriebe  
drum göhn mir jetzt, machets guet, oder lönd's doch aifach bliebe